

天台藏

觀音文義記

溫然寺 印行

天台藏之八

觀音玄義記

湛然寺

印行

觀音玄義記

印行者 湛然寺

地址：台南市忠義路二段38巷8號
電話：(〇六)二二二八五一八
郵撥：三一一九二三五一 聖哲帳戶

承印：祥光彩色製版社
地址：台南市東豐路53巷31號
電話：(〇六)二二二五七三
二三七八三六六

中華民國七十六年八月依普門會性老法師所藏木版原書影印一千部
佛曆三〇一四年
中華民國八十一年二月十九日再版五〇〇部
中華民國八十四年三月依本寺所藏木版原書三版一千部
佛曆三〇二二年

天台七祖天宮慧威尊者



天台八祖左溪玄朗尊者



觀世音菩薩普門品玄義記會本卷第一

宋四明沙門知禮述

知禮俯伏惟念早年慕學投迹寶雲遇授法師講說此品神根既鈍遂數諮疑先師念我學勤不辭提耳故所說義麤記在心昔同聞人今各衰朽慮乎先見不益後昆共勉不才鈔錄於世但疑識暗謬有所傳圓宗哲人刊正是望時天禧五年歲在辛酉八月一日絕筆故序。

觀音玄義

觀音玄義從略標之具存應云觀世音菩薩普門

品玄義。以其序中及以正文。具明人法。故且略標。言玄義者。能釋之義門也。玄者。幽微難見之稱。義者。深有所由也。斯蓋大師以三昧力。徹法性際。深見今品人法之意也。應知名等五義。皆悉幽微。七方便人。智莫能見。

△次示能說之人。

隋天台智者大師說

卽天台智者。旣是門人記錄所說。故不敢正斥其法諱也。天台山者。卽大師棲身入寂之所。故以此處顯其人也。若山之得名。居之所自。入滅相狀。滅

後靈異具於大本及輔行別傳等文。今不備述。智者者。卽隋帝求受菩薩大戒訖。師云。大王迂遵聖禁。宜號總持。王曰。地持經云。傳佛法燈。卽是智者。師旣傳燈。可號智者。自此凡上書疏。皆云弟子總持和南智者。言大師者。斯乃帝王大人所師。故稱也。非同今時補署之號。說者悅也。縱樂說之辯。悅妙悟之懷。異乎諸師採摭經論。著述疏章。消解經文也。故大忍法師覩智者說法。對眾歎云。此非文疏所載。乃是觀機縱辯。般若非鈍。非利。利鈍由緣。豐富適時。是其利相。池深花大。鈍可意得。

門人灌頂記

記錄乃是章安尊者解行靈異。始終事迹。本傳具彰。

釋文爲二。初釋序文二。初敘真應益物二。初正明真應二。初示二身妙用三。初明體妙故二用泯亡二。初法融應泯。

夫法界圓融。像無所像。

法界圓融者。色心依正。以卽性故。趣指一法。徧攝一切。諸法徧攝。亦復如是。法法互徧。皆無際畔。乃以無界而爲其界。此之法界。無不圓融。卽百界千

如百如千界也。是故得云唯色唯心唯依唯正若不爾者卽非圓融。觀音證此以爲本體。全此妙體而起應像。以法界應赴法界機。亦是以法界機感法界應。法界無二。能所自忘。感應尙忘。體用寧異。故雖設應無應可存。故云像無所像。

△二真如下。性淨真忘。

真如清淨。化無所化。

真如清淨者。起信論云。真如者。所謂心性不生不滅。是故一切法從本已來。離言說相。離名字相。離心緣相。畢竟平等。無有變異。不可破壞。唯是一心。

故名眞如。又云。此眞如體。無有可遣。以一切法。悉皆眞故。亦無可立。以一切法。皆同如故。旣不可破。立自絕言想。則與河沙煩惱。本不相應。故曰清淨。觀音證此。而爲本體。卽以此體。示諸眾生。令觀行知。或眞似見。此知見者。成伏斷益。若其未有此知見者。但能三業精進。成機。亦離眾苦。悉得名化。此皆眞身益物相也。問。同緣曰應。歎有名化。此二種身。皆非智德。今何以化而爲眞身。答。歎有之化。卽化現化也。今對像論化。取化轉化也。所以者何。上言於像。則應化皆像。自實報下至地獄身。皆已攝

盡。若欲化轉。凡賢入聖。須示真智。若非真身。不能化轉。言化無所化者。據性平等。忘於化功。雖令九道皆趣涅槃。而無眾生得滅度者。平等真法界。佛不度眾生。終日化物。終日無化。

△二雖像下。明用忘故。二益周徧。二初顯益周。

雖像無所像。無所而不像。

色心諸法。雖無生性。因緣和合。法爾而生。觀音妙證。同諸法性。雖無形相。眾機扣之。無像不現。此由絕於垂應之念。故能徧應法界羣機。其猶明鑑。無念而現。故云無所而不像。

△二化無下。冥益徧。

化無所化。無所而不化。

以上雖字貫此句初。雖中實性不可變化。不變而變。迷悟宛然。觀音順理。雖知不變。常以真智化一切凡。成不二聖。此則由無化物之念。故徧令他革迷成悟。其猶磁石無念而吸。故云無所而不化。

△三故無下。遮照相。卽結二身德相。二初應身相。故無在無不在。化應九道之身。

中道法界雙遮二邊。故無所在。當體雙照。故無不在。化應九道之身者。此中云化。作歛有釋。并應成

二顯益相足也。問經云應以佛身得度。卽現佛身。今那云九答佛界身者。有通有局。局在妙覺智相之身。三千實相以究盡故。尙非等覺心眼觀見。況乎下地及凡小耶。通則三教果頭之相。及以圓教凡聖所見。雖分麤妙。皆名佛身。然是隨機應現之相。是其事識。或是業識之所見。故雖是佛身。而通二乘菩薩界攝。經文從通。故云現十。今文從局。故云九道。

△二處有下。真身德。

處有不永有。寂入不二之旨。

通以九界名之爲有。以其皆有業報故也。應身雖
乃處在其中。而其真智自冥極理。故云寂入不二
之旨。前卽真身而垂應相。此卽應相而示真身。

△二是以下。明兩用攝生。

是以三業致請蒙脫苦崖。四弘爲誓使霑上樂。

上明真應兩用。旣然。今示與拔攝生之相。初二句
明真身拔苦。次二句示應身與樂。佛答前問。三業
顯機。感乎冥應。七難二求。及以三毒盡諸苦際。故
云蒙脫苦崖。佛答後問。三業顯應。赴其冥機。三土
眾生。十重獲益。終歸祕藏。故云使霑上樂。然其四

誓非專與樂。雖在此明實通上句。以上三業。卽能感之。因此明四誓。是能應之本。上下互顯。彼此無虧。應知三業亦通冥機。現在雖無宿生須具。

△二故婆下。兼明本迹二。初示諸名二。初今昔因名。故娑婆世界。受無畏之名。寶藏佛所。稟觀音之目。

今堪忍土。稱無畏者。此經兩出。怨賊難中。一人唱言。諸善男子。勿得恐怖。汝等應當一心稱觀世音名號。是菩薩能以無畏施於眾生。乃至云稱其名。故卽得解脫。又勸供養中。佛自歎云。是觀世音菩薩摩訶薩。於怖畏急難之中。能施無畏。是故此娑

婆世界。皆號之爲施無畏者。寶藏等者。悲華經云。過去散提嵐界。善持劫中。時有佛出。名曰寶藏。有轉輪王。名無量淨。第一太子三月供佛及比丘僧。發菩提心。若有眾生。受三途等一切苦惱。若能念我稱我名字。爲我天耳天眼聞見。不免苦者。我終不成無上菩提。寶藏佛云。汝觀一切眾生。欲斷眾苦。故今字汝爲觀世音。

△二已成下。過未果號。

已成種覺號。正法明。次當補處。稱爲普光功德。

已成等者。千手眼大悲經云。此菩薩不可思議威